

(5)

COMMENTATIO  
IN  
OPUS CAELATUM  
ANTIQUUM  
MUSEI PIO-CLEMENTINI


AUCTORE  
ARNOLDO HEEREN  
BREMENSI

A. M. SOC. REG. SCIENT. GOETTING. ASS.

Sculptoribus atque poetis  
Quidlibet audendi semper fuit aequa potestas .

---

ROMAE MDCCLXXXVI.  
APUD ANTONIUM FULGONIUM  
PRAESIDUM FACULTATE.





EMINENTISSIMO, AC REVERENDISSIMO DOMINO

IOSEPHO GARAMPI

S. R. E. CARDINALI,

EPISCOPO MONTISFALISCI,  
ET CORNETI

ARNOLDUS HEEREN

F.

**P**ures iam eosque eruditissimos viros  
in eo versatos fuisse nosti, CARDINA-  
LIS EMINENTISSIME, ut ex accuratiori & poe-  
seos & artium naturae cognitione praecepta  
quae artifices in exprimendis & imitandis poe-  
a 2 tarum

tarum descriptionibus sequi debent, eruerent, iisque observanda praescriberent. Quae quamvis ex hoc maxime fonte haurienda esse dubium esse nequeat, haud parum tamen lucis ex ipsis artificum operibus, in quibus varia utique fortuna poetam sibi imitandum sumserunt, iis afferri posse, adeoque haec ipsa tanto maioris aestimanda atque accuratiori explicatione digna esse, quisque facile videt. Atqui ex omnibus antiquitatis monumentis, quae temporum iniuria nobis reliquit, ac operibus maxime caelatis, quae cum integras historias exhibent, maxime huc pertinent, perpauca tantum sunt, in quibus artifex poetam ita secutus esset, ut eum verba illius ante oculos habuisse, & sibi exprimenda sumsisse, certo affirmari possit. Quamvis enim fundum historiae quam exprimebant ex poetarum maxime traditis petebant Graecorum artifices, tamen cum suo quoque iudicio uterentur, in operibus suis adornandis multa pro ipso operis consilio infletere, alia addere alia omittere solebant. Quae cum ita sint, & Tibi CARDINALIS EMINENTISSIME, & ceteris omnibus qui Tecum studio antiquitatis delectantur, operis huius antiqui, quod  
illu-

illustrandum mihi sumsi, explicationem, cum non arte solum & eruditione illud sese commendet, sed inter pauca illa antiquitatis monumenta, quae ipsas poetarum descriptiones oculis subiiciunt, principem forse locum obtineat, haud ingrati fore arbitror. Operis enim nostri auctor, quod ipsa explicatio docebit, & in singulis figuris adornandis, & in consilio totius operis concipiendo tam presso pede Aeschylum, nobilissimum Graecorum tragicum secutus est, ut, an ex omnibus antiquis operibus quae haecenus innotuerunt, ullum sit, in quo artifex poetam ita sibi exprimendum sumsisset, nesciam.

Quod autem Tibi, CARDINALIS EMINENTISSIME, hanc meam opellulam consacrem, illud velim habeas pro grati animi pignore, & doctrinae & humanitatis Tuae admiratione incensi. Obtigit mihi, quod omnes in votis habent, pauci obtinent, ut eam urbem viserem, quae tantum non sola praestantissima quaeque antiquitatis monumenta moenibus suis complectitur; ac si ex omni mea vita albo mihi lapide notandus est dies, illum esse sentio, quo Romam, caput mundi, adire mihi liquit: atqui secundiori quadam fortuna

na mihi evenit , ut & Tu , CARDINALIS AMPLISSIME , & alii quos verecundia nominare vetat , patriae suae aequae ac reipublicae litterariae decora , non me indignum haberent , in quem favorem suum conferrent . Serena itaque fronte accipias quaeso hoc quaecunque studiorum meorum specimen , quod si quis alius timida sane manu offerre Tibi audeo . Novi enim , ea aetate me esse , cui discere potius quam docere convenit ; novi eo loco me scribere , quo , quot mihi obtingent lectores , tot mihi erunt iudices ; novi denique ad Te me illud mittere , omnis antiquitatis accuratum arbitrum . Accedit , quod in ipso limine disputationis cum viro immortalis , qui in explicando hoc monumento lapsus est , res mihi gerenda erit ; viro , cui non patriae solum Musae coronam neclere voluerunt (a) ; sed quem vos quoque , cum in vivis esset excepistis , fovistis , egregiis denique praemiis ac honoribus affecistis ; mox autem , cum iniquo fato esset abreptus , eo loco monumentum ipsi negare non voluistis , quo nescio , an in omni orbe terrarum ,  
& ve-

---

(a) *Elogium Winkelmanni* , auctore V. I. Cb. G. Heyne , praeceptore & amico aeternum colendo .

Et vestra humanitate Et sua laude digniorem occupare potuisset (b). Quod cum prima vice, cum ipsa iam augusta templi maiestate animus sacro quodam horrore esset percussus, inopinatus aspicerem, Et vestrae humanitatis admiratio, Et tanti viri memoria ita me commovit, ut a lacrimis mihi temperare non potuissem, nisi subito animum cogitatio subiisset, eo consilio id a Vobis factum esse, ut Et meos populares tantosque alios ad urbem Vestram tanquam ad commune Musarum sacrarium ex omni Europa confluentes, tantis virtuti praenitiis propositis, ad bonarum artium studium excitaretis. Neque, si quid video, a scopo aberrastis! Sunt enim atque erunt, qui Et laudis studio, quo optimus quisque trahitur, Et ipso generosi pectoris impetu incensi, ad eas artes se accingent, quibus ille immortalem lauream consecutus est! Ad quam, quamvis nemo facile adspirabit, stadium tamen ingressis, quousque vires fendant, illud decurrere liceat. Tu vero, CARDINALIS EMINENTISSIME, ut favorem Tuum, quo  
hacte-

---

(b) Monumentum B. Winkelmanno cura V. I. Reiffenstheinii in Pantheo positum.

⊙ VIII ⊙

*hactenus non me indignum habuisti , in posterum quoque in me conferre velis , ea quae decet observantia , quam obnixissime rogo .*

*Dab. Romae die XVIII. Augusti An. S.  
MDCCLXXXVI.*



§. I.



Nter opera caelata antiqua, quae Ro-  
mae exstant, vix est aliud, ut Win-  
kelmanni verbis utar (a), quod in-  
genia antiquariorum magis exer-  
cuerit, quam illud, quod ab eo in-  
ter monumenta inedita Num. 148.

publicatum, & cum olim in aedibus Barberinis  
exstaret, iam in Museum Pio-Clementinum trans-  
latum est, in quo in eadem camera in qua Tiberis  
fluvii statua reposita est, intransibis ad dextram  
manum ultimo loco collocatum ac praestantissi-  
mo sarcophago marmoreo insculptum cernitur.  
Neque enim, cum non ipsa solummodo arte,  
qua effictum est sese commendet, sed in duobus  
quoque aliis monumentis repetitum cernatur, cum  
inde, fabulam in eo exhibitam saepissime ab anti-  
quis sculptoribus repraesentatam esse pateat, indi-  
gnum erat, in quo interpretando doctorum viro-  
rum studia versarentur. Marmora autem idem opus  
exhibentia, quae modo commemoravi, exstant  
alterum in aula aedium Iustiniani, alterum in villa  
Borghesiana; quae tamen cum utraque & temporis  
iniuria peius sint affecta, & artis praestantia nostro  
sint inferiora, neque, cum in alto collocata sint,  
accuratae disquisitioni facile subiici possint, nos il-  
lud aeri incidendum curavimus, atque in eo expo-

A                      nen-

(a) *Winkelm. Mon. ined. T. II. p. 193.*

nendo versabimur , quod in Museo Vaticano repositum est , ita tamen , ut ea , in quibus illa a nostro differant , quae tamen pauca sunt , suo quaevis loco adiciamus . Hic tantum praemonere liceat , in nostro opere nihil omnino recentiori manu esse restitutum , nec quidquam in eo praeter unum tripodis pedem , & gladii , quem homo ex ara descendens manu tenet , aciem , desiderari ; capulum enim , una cum manu , integrum adhuc superest . In marmore contra Iustiniano & superior pars operis , & ara Apollinis , cui sculptor , cum ramum ipsi impositum conspiceret , male integram arborem addidit , pessime restaurata est . Monumenti denique Borghesiani dimidia tantum pars conspicitur , altera ab artifice recentiore , nullo prorsus consilio , addita est . Quamvis enim non desint , qui alteram quoque monumenti partem integram adhuc superesse , atque olim muro adiunctam fuisse , contendunt , eam tamen videre mihi non contigit .

§. II.

Quamvis iam ex eo , quod idem hoc opus toties repetitum cernitur , pateat , fabulam in eo oculis subiectam , non posse esse ita reconditam , ut in poetarum & mythographorum scriptis vel rara vel nulla eius mentio fiat , nescio tamen quomodo factum sit , ut ante Winkelmannum omnes de eo exponendo fere desperaverint . Postquam enim alterum illud in aedibus Iustinianis , una cum ceteris quae ibi exstant antiquitatis monumentis , nulla tamen interpretatione adiecta , esset aeri incisum (b) , idem hoc iterum publicatum est a Sante Bar-

---

(b) *Galler. Iustin.* Tom. II. No. 145.

Bartoli inter *admiranda Romae antiqua* (c) ; quae quamvis a Bellorio annotationibus sint illustrata, nostro tamen , cum paucis his verbis „ *saevum & atrox facinus ignotum facinus* „ , omne missum faciat , nihil inde lucis attulit . Bartoli opus repetiit Montefalconius in *supplementis ad antiquitatem explicatam* (d) , qui illud quidem recte vidit , fabulam in eo exhibitam esse maxime insignem , omniumque ore celebratam , quae tamen sit ignorare se fatetur .

Primus , & quod scio , ultimus , qui in eo exponendo versatus est, fuit Winkelmannus, commune illud Germaniae inter Italos decus , qui inter

A 2                      mo-

(c) *Sante Bartoli Adm. Rom. Ant. T. 52. „ Saevum atque atrox facinus , ignotum facinus . Iacentes somno atque „ alta sepultos nocte , accensis facibus sistrisque gladiis „ hostes repentino impetu invadunt . Termini Dei solenni „ peragunt , posito eius simulacro & tripode cum aulaeis . „ Aram vero sublatam ex hostibus unius in caput dormientis „ vibrat ac iacit . Alii enses adversus dormientes ad necem „ intendunt . Hinc sacrificae duae iacentes sepoze gravatae altera securi nititur , altera demissam accensamque „ retinet facem . Huius ignoti facinoris duplex exstat „ exemplar , alterum in Barberinis , alterum in Iustinianis „ aedibus , ex quo similitudinem duximus „ .* Bartoli opus egregie quidem delineatum ac aeri incisum est , omissa tamen sunt nonnulla figurarum attributa , quae ad explicationem maxime faciunt .

(d) *Montf. Ant. expl. Suppl. Tom. IV. p. 31. Tab. XV. „ Irruption sur des gens qui dorment . Voilà une grande „ histoire , un fait des plus signalés ; mais je ne sais ce „ que ce peut être . Je n'oserai même par conjecture donner „ quelque explication d'une chose si singulière „ .*

monumenta inedita , & aeri illud incidendum denuo curavit , & interpretationem amplissimam adiecit (e) , quam nos paucis primo verbis repetere , tunc vero adcuratae disquisitioni subiicere constituimus ; & cum rationes , quare eam non admittendam esse putamus , exposuerimus , nostram lectorum iudicio submittemus ,

§. III.

Putat autem Winkelmannus marmore nostro repraesentari Cassandrae & Agamemnonis caedem , ab uxore Clytaemnestra , & Aegistho peractam . Cum enim Agamemnon rex Argivorum Graecorum copiis , quae Troiam obsidebant , decem annis praecesset , uxor Clytaemnestra , sola domi relicta Aegisthi , Thyestae filii , amore flagrare coepit , atque maritum , cum victor ex bello redux factus esset , dolo interfecit . Cum enim Aegisthus eum epulis exceperet , mox cum convivio accumberet , inopinatus in eum irruit , eumque una cum Cassandra , Priami filia , quam captivam ex Troia abduxerat , ense percussit . Haec quidem antiquissima Homeri narratio (f) , a qua tamen recentiorum poetarum (g) , qui Clytaemnestram cum Agamemnon in balneo corpus curaret , peplo superiniecto caput mariti cepisse , & cum subito se expedire non posset , eum interfecisse tradunt , commenta discedunt .

Cer-

---

(e) *Winkelm. Mon. ined.* n. 148. Explicatio legitur P. II. cap. 27. pag. 193 - 197.

(f) *Hom. Odys.* l. 405.

(g) *Aesch. Agamem.* v. 1377. *Soph. Electr.* v. 484. ut alios taceam .

Cernimus in opere nostro duas figuras, utraque iugulatas, alteram viri, alteram feminae, hanc Winkelmannus credit esse Cassandrae, illam Agamemnonis. Iuvenem stricto gladio Cassandrae adstantem esse Aegisthum, tres caeteros, quorum primus pepalum, quo obtectum fuerat Aegisthi corpus, removet, alter genibus residens sublato lapide in caput Cassandrae saevire videtur, ultimus denique, in dextra parte lapidis ex ara descendens conspicitur, socios esse Aegisthi, & sceleris socios. Feminam, quae accensa facie pone Aegisthum conspicitur, esse Clytaemnestram, quae cum facinus perpetratum sit noctu, facie lucem ipsi afferat; alteram autem, quae peplo obtenso tota fere tegitur, esse Electram filiam Clytaemnestrae. Vetulam illam, quae in altera parte exterrita conspicitur, esse nutricem Agamemnonis, tanti sceleris aspectu horrore percuttam. Ex quatuor illis figuris dormientibus unam, quae in lapide residet, non esse feminam sed virum, iuvenem nempe Orestem; tres reliquas, quarum una accensa facie ante aram in dextra parte operis humi prostrata iacet, alterae duae in altera parte operis conspiciuntur, esse ancillas Clytaemnestrae, post epulas vino & somno obrutas. Ingens illud pepalum, quod ex duobus terminis suspensum cernitur, obtentum esse ex veteri more, quo mulieres a virorum coetu eo arcebantur. Serpentes, crinibus Clytaemnestrae aliarumque figurarum innexas, esse symbola irae qua ad vindictam incendebantur, scenam autem rei gestae esse in porticu aedium Agamemnonis, non diurno sed nocturno tempore. Duobus terminis ante coenam sacrificium esse factum, positos autem eos esse in porticu ad ornatum aedium. Aram cum ramo quae in extrema

parte operis ad dextram conspicitur, esse aram Apollinis cum laurea, quam artifex, quoniam Cassandra Apollinis sacerdos fuerat, addiderat.

§. IV.

Proposita iam summi viri interpretatione, nam quae ad confirmandam suam sententiam passim disputat, suo quaevis loco examinabo, iam mihi ad curatori censuram eam subicere liceat, in qua ita versabor, ut primum de singulis figuris, tunc de consilio totius operis ex Winkelmanni sententia disputationem instituiam.

Quod ad duas primas figuras attinet, humi prostratas & gladio peremptas, quas Agamemnonem esse vult & Cassandra, negare quidem non auiam, eas per se consideratas & unum & alteram repraesentare posse; at vero dicendum esset, sculptorem, si eos ita effinxisset, cum in opere suo caelando neque Homeri neque caeterorum poetarum auctoritatem secutus sit, contra omnem historiae fidem peccasse. Nam si Homeri descriptionem sibi exprimendam sumisisset, Agamemnonem convivio accubentem (b), si recentiorum poetarum (i) eum in balneo corpus curantem repraesentare debuisset. Atqui in opere nostro cernimus tantum hominem a sede sua in terram deiectum & gladio percussum, balnei aut convivii apparatus nullus conspicitur. Quod si tamen sint, qui haec ab artificis arbitrio pendere, fabulamque pro consilio operis ab eo inflecti potuisse credant, ii velim cogitent, poetarum de Agamemnonis caede tradita ita iam omnium mentibus inhaesisse, ut parum ab iis discedere posset artifex

(b) *Odyss.* l. c.

(i) *Aesch.* & *Soph.* ll. cc.

artifex si consilium operis a spectatoribus intelligi vellet .

Verum his insistere nolo , leviora enim sunt : pergo iam ad ceteras figuras , ex quibus primo loco iuvenis , qui stricto gladio Cassandrae corpori adflat , in scenam prodeat . Hunc volunt esse Aegisthum . Atqui videmus eum averſo vultu ac horrore percusſum feminae vulnus inferre , quod quomodo artificii in mentem venire potuiſſet ſi Aegisthum , Caſſandram advenam eamque captivam iugulantem , repraeſentare voluiſſet , equidem non aſſequor .

Praeter Aegisthum tres alii cernuntur viri , quorum primus ſtricto gladio Agamemnonis corpori adflat ; alter genibus reſidens Caſſandrae corpus lapide quodam petere videtur , tertius denique ex ara deſcendens conſpicitur ; quos omnes comites eſſe vult Aegisthi ac ſcleris ſocios , auxilium ipſi ferentes . Quod ſi foret , non historiae ſolum fidem iterum neglexiſſet caelator , omnes enim Agamemnonem improviſo ab Aegistho ſolo & Clytaemneſtra oppreſſum eſſe perhibent (k) , ſed ſic quoque rem ſuam inſtituiſſet , ut ieunius nihil eſſe poſſit . Quis enim feret , tres figuras neque nomine neque certo charactere diſtinctas ita ab artifice additas fuiſſe , ut primas quaſi fabulae partes ſuſtinere videantur ? Altero vero illo , qui ſtricto gladio ex ara deſcendit , deſignari poſſe Aegisthi comitem , auxilium ipſi ferentem , omnino nego . Ut enim taceam , vix fieri potuiſſe ut operis noſtri auctor eum ſine ulla ratione ex ara deſcendentem fecerit , ut taceam ſi-

A 4

gu-

(k) *Od.* λ . v. 405. *Aeſch. Agam.* v. 1377. *Soph. Electr.* v. 525.

guram comitis, ad auxilium ferendum irruentis, cum, quod adspectus ipse docet, caedes iam sit perfecta, caeteris omnino non convenire; quis non videt, ingressum omnemque habitum corporis non esse hominis ad opem ferendam properantis, sed submissio gradu ex ara descendentis, feminamque, quae ante aram dormiens conspicitur, ut experge faciat caventis? Quod quomodo conveniret comiti Aegisthi? Quid? quod ramum, quem Winkelmannus, quod infra docebitur, male pro laurea habuit manu tenens conspicitur, quod supplicis est, non hominis ad certamen irruentis.

Pergo ad feminam illam, quae anguibus capillo innexis & accensa face armata Aegistho adstat, quam Clytaemnestram esse vult Winkelmannus. Face enim accensa, cum res noctu geratur, eam lucem asserre Aegistho, anguibus autem quae & brachio & capillo implexae conspiciuntur, iram horrendam atque vindictae cupiditatem designari. Quod tamen utrumque locum habere non posse, ipsa iam figura habitusque corporis docet. Videmus enim eam non sublata face lucem asserentem, sed face praetensa in Aegisthum irruentem, non immoto pede restantem, sed minaci vultu horrendoque ingressu in Aegisthum pergentem, ab artifice esse exsculptam.

Quod autem ad serpentes attinet, qui & Clytaemnestrae & aliorum crinibus innexi cernuntur, iis in opere nostro iram designari posse, omnino nego. Ut enim taceam pellime hoc institutum esse ab artifice, ut ea quae ipso vultu corporisque habitu & exprimenda essent & exprimi possent, symbolis exprimeret, praeter Clytaemnestram cernimus duas alias figuras anguibus instructas, alteram illam quae



quae cum duabus aliis saxo innixa & fomno obruta cernitur, (ubi tamen anguis cum in medio earum delabatur, potius ad omnes tres pertinere videtur) alteram quae in dextra parte operis humi prostrata dormit. Atqui iram dormientibus tribuere nonne ridiculum esset? Erat Aegisthus, erant comites in caesos saevientes, quibus melius haec convenissent, miseris ancillis, iisque dormientibus, non conveniunt.

Quod denique ad peplum illud attinet, de termino suspensum, quo ex Winkelmanni sententia tempore antiquissimo mulieres a virorum coetu arcebantur, nullo sane loco minus apto sculptorem illud operi suo addere potuisse, cum mulierem impudicam in ipsum maritum saevientem effingeret, omnes facile vident.

#### §. V.

Iis quae haftenus disputavi patere arbitror, vix ullam esse figuram in toto opere, quae ex Winkelmanni sententia commodam interpretationem admittat; iam de figurarum dispositione consilioque totius operis, quale illud secundum Winkelmannum sculptor animo conceptum habebat, pauca subiungam, quo ostensurum me esse arbitror, operis nostri auctorem, si viri summi explicatio admitenda esset, in figurarum dispositione, omnisque operis idea concipienda ita peccasse, ut eum vix limites artis salutasse dicendum foret, quod tamen ipsa operis praestantia quod nobis reliquit abunde refutatur.

Quodsi Agamemnonis & Cassandreae caedem ab uxore & Aegistho factam effingere voluisset artifex, princeps sane figura fuisset Agamemnon, atque in eo interficiendo & Aegisthum & Clytaemnestram

fram occupatos oculis subiicere debuisset . Quamvis enim Cassandra una cum eo interfecta sit , hanc tamen parum curabat Aegisthus , neque nisi Clytaemnestrae iussu , quae ipsi , quod ab Agamemnone pellicis loco adducta esset , irascebatur , occisa esset . Atqui in nostro opere Agamemnonem quasi neglectum ac soli comiti cuidam relictum conspiciamus , Cassandrae enim & Aegisthum & Clytaemnestram adstantes cernimus , quod quomodo in mentem venire potuisset artificii , si Agamemnonis caedem repraesentare voluisset ?

Quodsi porro duo caesorum corpora humi prostrata aspiciamus , patet vulnera lethalia iis iam esse inflicta ; nullum cernitur vitae signum , cum neque vi neque precibus vim illatam depellere studeant . Dicendum itaque esset , sculptorem non ipsam caedem repraesentasse , sed tempus caede peracta sibi exprimendum sumxisse , quo nihil potest esse ieiunius . Cernimus enim Aegisthum frustra in corpora mortua saevientem , comitem re iam peracta ad opem ferendam frustra accurrentem ; Clytaemnestram denique frustra face accensa lucem alligentem .

#### §. VI.

Quae cum ita sint , virum immortalem in explicando egregio hoc antiquo opere in errorem incidisse , eiusque interpretationem nullo modo admitti posse , omnes videre arbitror , cui num ea , quae iam a me exhibebitur , praeferenda sit , a lectorum iudicio pendeat , quo si probabitur , amplissima me praemia tulisse arbitrabor . Credo autem hoc opere caelato repraesentari *Orestem* , *matris Clytaemnestrae & Aegisthi caede modo peracta* , *subito furiis correptum* , cui artifex ex solemni

cae-

caelatorum more , cum in utraque parte marmoris locum sibi adhuc vacuum relictum esse videret , alterum quasi fabulae actum addidit , in nullo alio , quantum mihi innotuit , antiquitatis monumento expressum : *Orestem in ara Apollinis Delphici furis obsessum , earumque custodiam cum ab Apolline essent infopitae , fallentem* . In exponenda autem & probanda mea sententia ita versabor , ut primum hanc Orestis historiam lectoribus paucis in memoriam revocem ; tunc ad figurarum explicationem , additis semper poetarum locis quae sculptor expressit , me accingam , denique de omnis operis consilio , ac de idea , qualem eam auctor animo conceptam habebat , iudicium feram .

§. VII.

Vix erat in omni antiquitate fabula magis decantata , atque a pluribus poetis tractata , quam ea de fatis Orestis . Primo enim loco expositam eam invenimus ab Homero (1), quem exceperunt omnes ut vocantur , poetae cyclici , qui cum omnem Troiani belli principumque Graecorum usque ad Ulyssis reditum historiam enarrarent , familiae Agamemnonis fata copiosissime exponebant . Eorum porro carmina , ex quibus nullum nobis superstes esse voluit fortuna , fontes erant , ex quibus pleno ore hauriebant Graecorum tragici , qui quamquam omnes , tribus tantum exceptis , temporum iniuria perierunt , hi tamen ipsi qui nobis servati sunt omnes , fabulam hanc tractandam sibi sumserunt . Aeschylus enim duabus tragoediis Orestis historiam exposuit , Choe-phoris & Eumenidibus ; Sophoclis exstat *Electra* , Euripidis vero & *Electra* & *Orestes* legitur . Hos ex-

---

(1) *Od.* γ. v. 306.

ceperunt immensus poetarum recentiorum , mythographorum , quid ? quod & rhetorum numerus , qui in tractando hoc argumento ingenii vires exercebant .

Quae cum ita sint, res ipsa docet, fabulam hanc, cum quisque pro vario operis consilio eam inflecteret, alia adderet, alia omitteret, atque id maxime curaret , ut eam nova quasi veste indutam lectorum oculis subiiceret, non ab omnibus eodem modo enarratam esse posse . Verum haec copiose exponere, alienum foret a consilio meo ; mihi, qui ea tantum quae ad rem ipsam pertinent, afferre constitui, sufficiat, Orestis fabulam, prout ab *Aeschylō* (m) tractata est . *quem in opere suo adornando fere totum secutus est artifex* , lectoribus in memoriam revocare; quodsi tamen ex aliorum poetarum auctorumque locis nova lux affulgeat operi nostro, in decursu disputationis ea lectoribus non invidebo .

#### §. VIII.

Clytaemnestra atque Aegisthus, cum Agamemnonem ex bello Troiano reducem dolo interfecissent, Orestem quoque, unicum filium quem Clytaemnestra ex Agamemnone conceperat, veriti ne, cum ad virilem aetatem pervenisset, patris mortem ulcisceretur, occidere statuerunt . Soror autem, Electra clam eum matris insidiis subreptum misit ad Strophum, Orchomeni regem, Pyladis patrem; a quo non modo exceptus est & educatus; sed cum Pylade quoque artissimum illud amicitiae vinculum,

no-

---

(m) Exposuit *Aeschylus* Orestis historiam in duabus tragoediis, *Choëphoris* & *Emmenidibus* . Prior continet reditum iuvenis in Argos ac matris ac Aegisthi caedem ; altera Furarum iras ac caedis expiationem Athenis factam .

nostro adhuc tempore omnium ore celebratum, contraxit. Cum vero ad virilem aetatem pervenisset, Apollo, ut patris mortem ulcisceretur, oraculis eum monuit, fore enim, ut patris vindicta neglecta, ipse misera morte periret. Orestes itaque & vindictae cupiditate incensus, & patrium regnum recuperaturus, una cum Pylade Argos contendit, atque cum sororem Electram in patris tumultu, inferias ipsi ferentem, deprehendisset, consilia cum ea de interficiendo Aegistho & Clytaemnestra communicat. Electrae itaque aedium custodia demandata, hospites se esse fingunt, fictumque de Orestis mortis nuntium afferunt. Qua re Aegisthus insperato gaudio affectus, accurrit, ab Oreste autem & Pylade gladio exceptus, interficitur. Caede hac peracta Orestes matrem manu correptam in eundem locum, quo Aegisthi corpus prostratum iacebat, abduxit, eamque, frustra supplices manus pectoraque quibus eum enutriverat obtendentem, ense peremit. At vero vix manus suas materno sanguine maculaverat, cum iam irruunt in eum Furiae, eumque crudelissimis poenis exagitatum, patriam sedem iterum relinquere cogunt. Cum itaque nullum sibi aliud praesidium relictum esse videret, Delphos confugit, atque in ara Apollinis Pythii, qui caedis ipsi auctor exstiterat, supplex confedit. Furiae autem ipsum persecutae, cum arae sanctitatem revererentur, eam obsidentes, perpetuam custodiam egerunt. Qua re commotus Apollo somnum iis immisit, atque Orestem ut Athenas se conferat, littemque suam a Minerva & populo Atheniensium diiudicare faciat, monet. Orestes itaque, clam ex ara descendens, ex custodia elabitur; Furiae autem umbra Clytaemnestrae subito expergescit eum.

infec-

insequuntur, & cum Athenis ad aram Minervae eum deprehendissent, Minervae arbitrium certaminis committunt. Minerva autem illud ad Atheniensem populum detulit, a quo Orestes culpa liberatur, furiisque indignantibus ara dedicatur. Qua re placatae, Oreste libero dimisso, ad inferos redeunt. Haec quidem Aeschylus; nam quae alii poetae de ceteris Orestis fati tradiderunt, utpote a consilio meo aliena, omitto.

§. IX.

Ex omni hac Orestis historia operis nostri auctor duas sibi scenas representandas sumit: primam eamque principem, *Orestem post matris caedem furiis correptum*, alteram, ut locum in utraque lapidis parte sibi relictum, expleret, *Orestem ex ara Apollinis, Furiis insopitis descendantem*. Quod ut melius pateat, iam ad ipsam figurarum explicationem me accingo.

§. X.

Quod ad virum illum attinet qui supinus a se deiectus, humi prostratus, vitaequae iam expers conspicitur, facile vident omnes, eum debere esse *Aegisthum*, quem secundum Aeschylum primo loco interfecerat Orestes (n). Sedes autem, a qua deiectus cernitur, est *thronus Agamemnonis*, quem ille nefando scelere occupaverat. Rem enim ita conceperat animo artifex, Aegisthum ab Oreste in patris throno sedentem esse deprehensum, atque ab eo, cum vindictae cupiditate flagraret, esse correptum, gladio percussum atque in terram deiectum. In quo, quamvis egregium artificis iudicium omnes mecum laudabunt, inventionis tamen laudem non ipsi

---

(n) *Choëph.* v. 888.

ipsi tribuendam esse existimo. Expressit enim illum immortalis poetae locum, in quo Orestem cum sorore de caede consilia agitantem, ita loquentem inducit (o) :

Καθεῖνον ἐν θρόνοισιν εἰ ἐυρήσω πατρός  
Εὖ ἴσθι καὶ κατ' ὀφθαλμοὺς βαλεῖ  
Πρὶν αὐτὸν εἰπεῖν, ποδᾶπὲς ὁ ξένος, νεκρὸν  
Θήσω, ποδώκει παρακαλῶν χαλκεύματι.

*Si illum in patris throno sedentem invenero, scias pro certo, priusquam, quis sit hospes ille interroga-verit, celeri ense me eum interfecitum esse.*

§. XI.

Feminam quae prope Aegisthum seminuda in terram deiecta ac iam caesa cernitur, esse puto *Clytaemnestram*, quam Orestes post Aegisthum eodem loco occiderat. Cum enim eam manu correptam ad eum locum raperet, quo mortuum iacebat Aegisthi corpus, sic eam apud Aeschylum alloquitur (p),

Επεὶ πρὸς αὐτὸν τόνδε σε σφάξαι θέλω.  
Καὶ ζῶντα γὰρ νιν κρείσσον' ἤγήσω πατρός.  
Τούτῳ θανούσ' συγκαθεύδ' ἐπεὶ φιλεῖς  
Τὸν ἄνδρα τούτον, ὃν δ' ἐχρην φιλεῖν συγείς.

*Iuxta hunc ipsum enim te immolabo, nam cum in-vivis esset, maioris cum habuisti quam patrem. Dormi cum eo in morte; flagras enim eius amore, & quem amare deberes in odio habes.*

Quem sane locum poetae ita expressit artifex, ut utri eorum maior laus tribuenda sit nesciam.

No-

(o) *Choëph.* v. 570. In versione latina quam ubivis adieci, non omnem verborum ornatum, sed sensum tantum reddere volui, quod hic semel monuisse sufficiat.

(p) *Choëph.* v. 904.

Noster enim omnem Clytaemnestrae figuram ex brevi illa sed divina poetae descriptione τόντω θανούσα συγκαθείδης & animo concepitse & expressisse videtur. Ita enim eam effinxit, ut si ex vultu solo res diiudicanda esset, alto potius somno obruta, quam morte oppressa videretur. Nullum enim in eo terroris vestigium conspicitur: os vix apertum cernitur, omnisque vultus est compositus. Atqui si brachium a saxo cui incumbit caput, languide in terram demissum, si corpus vi τανυλέγεις θανατοῖο in terra extensum conspicimus, quis non videt, figuram hanc non esse dormientis sed mortuae; quis vero non laudabit egregium artificis iudicium, qui commiserationem potius movere, quam horrorem incutere voluit? Quod autem seminudam eam effinxit, cum non vi solum ad locum illum esset abducta, sed ut filii animum ad misericordiam flecteret, vestibis direptis nuda ipsi peiora, quibus enutritus erat, obiecisset (q), suo utique iure fecit.

§. XII.

Pergo ad iuvenem illum, qui stricto gladio sed averso capite territoque vultu Clytaemnestrae corpori adstat, eumque puto esse *Orestem*. Effinxit autem eum operis nostri auctor, quod infra pluribus probabitur, eo momento, quo furiis modo conspectis, circumstantibus apud Aeschylum haec verba acclamat (r),

Διῶαι

(q) *Choëph.* v. 891.

(r) *Choëph.* v. 1043. Apud Aeschylum loquitur ad chorum, qui ex servis constat, cui noster, cum in marmore ipsi locus non esset, solam Gelisam substituit.



Δμῶα γυναικες, αἰδε Γοργόνων δ' ἴκην

Φαιωχίτωνες καὶ πεπλεκτανημένα

Πυκνοῖς δράκουσιν, - οὐκ ἐτ' ἂν μείναιμ' ἐγώ.

*Servae! illae Gorgonum instar nigrae sunt veste indutae, densisque anguibus armatae, non amplius manebo!*

Ita autem eum representavit, ut gladio sublato, laevaue manu, qua vaginam tenet, praetensa, impetum furiarum reprimere velle videatur; sed cum horrendum earum aspectum ferre non posset, caput avertat. Quo sane simul & ipsum generosum iuvenis animum, & horrorem quo, tanto aspectu subito oculis obiecto, percussus erat; verbo, quo naturam ipsam ita expressit, ut melius eam exprimi posse negem.

### §. XIII.

Duae porro feminae, quae a laeva parte Orestem aggrediuntur, *Furiae* sunt, quarum altera irato vultu, horrendo ingressu, dextra manu facem ardentem, laeva anguem, qui infesto ore iuvenem petere videtur, praetendens, & crinibus serpentes innoxos gerens, in Orestem irruit; altera, in nostro quidem opere nullo attributo est instructa; sed in marmore Iustiniano haec quoque manu sublata facem ardentem tenet; quid? quod, tertiae quoque Furiae caput ibi mihi cernere videor (obscurum enim est, cum in alto collocatum sit opus): quod si foret, commune recentiorum poetarum traditum, qui furiarum numerum ad tres reduxerunt, secutus esset artifex. Sed haec & incerta sunt, & a solo sculptoris arbitrio pendent. In adornandis autem earum figuris, haec verba Orestis apud Aeschylum ante oculos habuisse videtur (s):

B

αἰδε

(s) *Choëph.* l. c.

αἶθε Τοργόνων δῖκην  
 θαιωχίτωνες καὶ πεπλεκτανημένα  
 Πυκνοῖς δράκουσιν,

Sunt enim, solito tamen more & longa veste indutae, & anguibus armatae. In eo autem miremur auctoris & artem & iudicium, quod dirum hunc Furiarum aspectum, ne horrorem spectatoribus incuteret, ita mitigaverit, ut ipsas Furias sine voluptate aspicere nequeamus. Vultu sunt severo & minaci; sed eodem iuvenili & pulchro. Qua tamen arte saepissime usos esse artifices antiquos, observatum iam est Winkelmanno (1).

§. XIV.

Alterum iuvenem qui Oresti a dextra, stricto & ipse gladio, corpori Aegisthi adstat, credo esse *Pyladem*, Orestis amicum & comitem. Dextra tenet gladium, recens enim erat a caede, sinistra vestem, qua obtectum fuerat Aegisthi corpus, ut nudum illud ostendat spectatoribus, aufert.

Iuxta eum conspicitur vetula, terrore vultu sublatiisque manibus. Est vero ea *Geliffa* nutrix Orestis, quae cum non Aegisthum solum, sed ipsam matrem a filio occisam conspiceret, tantum facinoris horrore altum clamorem tollit. Erunt forsan qui eam non caesorum sed Furiarum aspectu perterritam esse existiment; sed secundum Aeschylum Furiae a solo Oreste cernuntur; quod si negligere voluisset sculptor, in Pyladis quoque vultu horrorem exprimere debuisset.

§. XV.

---

(1) *Winkelm*: *Storia delle arti del disegno*, T. II, p. 323. In novissima praeclara operis immortalis editione & *Mon. ined.* pag. 200.

§. XV.

Ad Clytaemnestrae caput iuvenis genubus residens conspicitur, qui vel lapidem, vel quidquid sit, utraque manu sublatum tenet; quem esse puto aut *servum* aut *comitem Orestis*. Eum enim non solum cum Pylade, sed servorum manu stipatum, venisse, discimus ex *Aeschilo*, qui Clytaemnestram, ipsum, cum quis esset adhuc ignoraret, hospitio excipientem, ita ad servum loquentem inducit (u):

“Αγ’ αὐτὸν εἰς ἀνδράνας ἐυξένους δόμων  
Οπισθέπους δὲ τοὺςδε καὶ ξυνομπόρους.

*Duc eum in conclavia virorum, cum servis hisce atque itineris comitibus.*

Ex quibus sculptor, cum in reliquis Aeschyli auctoritatem sequeretur, hunc unum repraesentare voluit.

Verum difficilior oritur quaestio, quid illud sit, quod in manu habeat, & quo consilio sculptor eum ita effinxerit, ut illud ambabus manibus sublatum teneat. Winkelmannus illud pro scabello habuit (x), quod tamen, cum & scabelli magnitudinem excedat, nec formam scabelli habeat, cum ne pedibus quidem sit instructum, locum habere vix potest. Ego vero, marmore Iustiniano accuratius examinato, nullus dubito, esse illud aram (y), ex lapide illo, in quo recumbit Clytaemnestrae caput, qui in marmore Iustiniano quadratus est, ab-

B 2

reptam.

(u) *Choëph.* v. 704. 705.

(x) *Mon. ined.* pag. 195.

(y) Eadem est Bellorii sententia in *annotationibus ad Admir. Rom. Ant.* N. 52, quas supra dedi cf. §. 2.

reptam . Primo enim est solita arae forma , oblonga nempe quadrata, parte & inferiore & superiore paululum prostante . In marmore vero Iulianiano , solito quoque arae ornatu, florum nempe corona, decoratum est . Porro , tanto esse illud pondere , ut hominis unius vires fere superet , iuvenis qui illud sublatum tenet , omnis habitus ostendit . Denique res geritur vel in porticu vel in aedibus Agamemnonis , quos & aris & superimpositis Deorum statuis ornatos fuisse , & nostrum marmor in quo Herma conspicitur , & locus *Sophoclis* docet (z) . Is enim Orestem ad matrem occidendam ex porticu ipsas aedes intrantem , sic loquentem inducit .

πατῶα προσκύσανθ' ἔδην

Θεῶν, ὅσοι περ πέπυλα ναίουσιν τάδε .

*adorantem patrias aras deorum , quotquot atrium  
hoc tenent .*

Quodsi autem est ara , eam a servo eo consilio subtractam esse puto, ne Clytaemnestrae modo caesae sanguine pollueretur . Servum enim eo consilio eam sublatam tenere , ut eam in caput Clytaemnestrae impingeret, adeoque in mortuam saeviret, neque arae sanctitas , neque totius operis consilium permittit .

Si autem sint , qui eam non pro ara sed pro sede habeant , cum in re incerta nihil certi affirmare audeam , iis non adversabor . Quod si foret , artificem rem ita animo concepisse dicendum esset, ut Orestes & Aegisthum & matrem thronis sedentes corripuerit ; ( quod quamvis adversatur Aeschilo , melius conveniret cum Euripide , apud quem ὄρ-  
vov

(z) *Soph. Electr.* v. 1375.

νοις ἡμενοι (aa) vocantur), servus autem sedem eo consilio subtraxerit ut honestius caderet, neque ut Aegisthus supina a sede deiceretur.

Ego, cum prima vice marmor Iustinianum aspicerem, post aram illam, seu lapidem, arcus, nervo remisso instructi, vestigia mihi cernere videbar; adeoque in opinionem incidi, non esse aram sed pharetram. (Est enim in marmore illo minoris molis quam in nostro). Quod si esset, doctissime, sane institutum fuisset ab artifice; novimus enim, non quidem ex Aeschilo, sed ex aliis poetis, Orestis ad arcendum Furiarum impetum, arcum ab Apolline esse datum. Sic enim Orestes furibundus apud Euripidem (bb).

Δὸς τόξα μοι κερεῦλκα, δῶρα Ἀοξίου,  
Οἷς μ' εἶπ' Ἀπόλλων ἑξαμύνεσθαι θιὰς,  
Εἰ μ' ἐμφοροῖεν μανίαςιν συσσήμασι.

*Da mihi arcum donum Apollinis, quo ille Furiarum impetum arcendum esse dixit, si terrore iniecto, furorem mihi incuterent.*

Euripides autem, teste Scholiasta (cc) expresserat *Stesichorum*: Στησίχορον δ' ἐπείμενος τόξα φησὶν αὐτὸν εἰληφέναι παρὰ Ἀπόλλωνος. „*Stesichori* „*autem auctoritatem secutus, dicit, arcum eum* „*ab Apolline accepisse* „. Dicendum itaque esset, Orestem & arcum & pharetram servo custodiendam dedisse. Verum re accuratius considerata, vidi ea quae a me pro arcus vestigiis habita erant, esse tantum plicas pep̄ti, quod suspensum conspicitur;

B 3      adeo-

(aa) Euripid. *Electr.* v. 304.

(bb) Euripid. *Orest.* v. 268.

(cc) Scholiast. Eurip. ad l. e.

aleoque ea quae modo dixi, eo tantum consilio hic posita sunt, ne alii post me in eundem errorem incidentes, male me ignorantiae arguant.

§. XVI.

In dextra parte lapidis ingens peplum extensum cernitur, ab altera parte de Herma suspensum, ab altera desuper nodo annexum. (Altera enim Herma quae in Winkelmanni opere aeri incisa cernitur, in marmore non exstat). Est autem *peplum illud idem*, quo olim *Clytaemnestra* marito cum in balneo esset, insidias struxerat, quod quo consilio additum sit ab artifice, iterum discimus ex Aeschilo, qui Orestem, caede matris peracta, expansum illud spectatoribus ostendisse, auctor est. Sic enim eum loquentem inducit (dd).

Ἰδεσθε δ' αὖτε τῶνδε ἐπήκοοι κακῶν  
Τὸ μνηάνημα δεσμὸν ἄθλιω πατρὶ  
Πέδας τε χερσὶν καὶ ποδῶν ξυνωρίδα.  
Εκτείναντ' αὐτὸν καὶ κυκλῶ παρασάδον  
Στήθεσιν ἀνδρῶν δειξάθ', ὥς ἴδοι πατήρ,  
Οὐχ εὐμὸς, ἀλλ' ὅπαντ' ἐποπτεύων τάδε  
"Ἥλιος, ἀνὰ νύκτα μητρὸς ἔργα τῆς ἐμῆς.

Conspicite, quotquot adestis malorum meorum testes, insidias misero patri struclas, manuumque & pedum ligacula. Expandite ea, & ubique circumstantes ostendite virorum hoc vinculum, ut videat pater, non meum dico, sed qui omnia lustrat, Solem, nefanda matris meae opera.

Herma denique, & ad ornatum aedium, & ut peplum de ea suspendi posset addita est.

§. XVII.

(dd) Choëph. v. 980.

§. XVII.

Ea quae haftenus explicavi , pertinent ad primam eamque principem fabulae scenam. Pergo iam ad alteram, qua artifex *Orestem ab ara Apollinis Delphici descendentem* , ac *Furiarum ab Apolline insopitarum custodiam fullentem* , repraesentavit ; ita tamen, ut eam mediam divideret, ac tres figuras in dextra, duas alteras in laeva marmoris parte effingeret; quod quo iure sibi sumserit, postea disputabitur; iam in singulis figuris explicandis pergere liceat .

Primo autem omnium eum locum *Aeschyli* asserendum puto , quem operis nostri auctor fere totum expressit . Exstat ille in *Eumenidibus*, ubi poeta vatem Pythiam ( res enim geritur Delphis ) , sic loquentem inducit (cc) .

Ορῶ δ' ἐπ' ὀμφαλῷ μὲν ἄνδρα θεομουσῇ  
 Ἐδραν ἔχοντα προστρέπαιον, αἵματι  
 Στάζοντα χεῖρας, καὶ νεοσπαδὲς ξίφος  
 ἔχοντ', ἐλαίας θ' ὑψιγένην κλαδὸν  
 Ἀήναι μεγίστῃ σοφράνῳ ἐσεμμένον  
 Ἀρνῆτι μαλλῶ. τῆδε γὰρ τράνω ἐρῶ.  
 Πρόσθεν δ' ἐτ' ἀνδρὲς τιῦδε θαύματος λόχος  
 Εὐδαίη γυναικῶν ἐν θρονόισιν ἤμενοι.  
 Οὗτοι γυναῖκες, ἀλλὰ Γόργονας λέγω.  
 Οὐδ' αὖτε Γοργεῖδισιν ἐκάσω τύποις.  
 (Εἶδ' ἐν ποτ' ἦδ' ὀφίνῳ γεγραμμένας  
 Δείπνον φέρουσας) ἅπτεροι γέ μιν ἰδεῖν  
 Αὐταί, μελαινάδ' ἐς τὸ πᾶν βδελυκτρῶσι  
 Ρέγκουσι δ' οὐ πλασθεῖσι φυσιάμασι.  
 Ἐκ δ' ὀμμάτων λείκουσι δυσφιλῆ βίαν.  
 Καὶ κόσμος, οὔτε πρὸς θεῶν ἀγάλματα  
 Φέρειν δίκαιος, οὔτ' ἐς ἀνθρώπων σέβας.

B 4

Video

(cc) *Aesch. Eumenid.* v. 40-56.

*Video in umbilico*, (terrae scilicet, i. e. in ara Apollinis Delphici, quam in medio terrae collocatam esse putabant), *virum diis invisum, supplicem, manus stillantem sanguine, & recens strictum enses, & altum oleae rami lana candida ornatum tenentem, sedem habentem*. Ante eum autem agmen mirabile mulierum, in thronis sedentium, dormit: Gorgonas potius quam mulieres eas dicerem. Neque tamen Gorgonibus eas similes esse dico, (vidi enim eas quondam depictas Phinei prandium auferentes). Hae enim sunt sine alis, nigrae, tristes visu, stertunt vero non fido somno, atque ex oculis stillant terrorem. Gerunt autem ornatum, quem neque ad Deorum aras neque in hominum aedes portare fas est.

Cernimus primo in opere nostro solitam tripodis Delphici figuram, quem sculptor historiae fidem servaturus super rupem collocavit. Novimus enim hanc vatis Pythiae sedem positam fuisse super speluncam, ex cuius ore vapores, furorem excitantes, provehebant. Testes est ut alios taceam *Diodorus Siculus*, qui in opere suo & oraculi Delphici inventionis historiam, & tripodis ex quo vates vaticinia reddere solebat, descriptionem nobis reliquit (ff).

§. XVIII.

Ex ara illa descendentem conspicimus juvenem, quem, quod ex iis quae dixi iam patet, esse puto *Orestem*. Dextra tenet adhuc gladium quo matrem iugulaverat, secundum illud Aeschyli (gg).

... VEO-

(ff) *Diod. Sic.* Tom. II. p. 101. 102. Ed. Wesseling. Caetera dabit *Spanhem.* ad *Callim. hymn. in Del.* v. 90. p. 384.

(gg) *Eumenid.* v. 42. 43.



..... νεοσπαδὲς ξίφος

ἔχοντα .....

*recens stridulum ensē tenentem :*

Sinistra autem vaginam . Brachio , heroum more , chlamys iniecta est . In ara ramus conspicitur , quem *Winkelmannus* quod ara Apollini sacra erat , pro laurea habuit . Verum meliora docet *Aeschylus* (hh) .

..... αἵματι

στάζοντα χεῖρας καὶ νεοσπαδὲς ξίφος

ἔχοντα , ΕΛΑΙΑΣ δ' ὑψιγένητον κλαδὸν

λήνει μείσσει σοφρόνως ἐσεμμένον

ἀρνῆτι μάλλ' .

Ex quo patet ramum illum non esse lauream , sed oleam , quam supplices cum ad aram confugerent , solito more prae se ferre solebant . In eo tamen noster a poetae descriptione discessit , ut eam cum Orestes iam sub Apollinis tutela ex ara descenderet , non in Orestis manu , sed arae impostam effinxerit . In ipso autem opere miremur sculptoris artem , qua iuvenem , timido ac submisso gradu digitis incedentem , oculisque in Furiam ante aram prostratam ac somno obrutam , quam ne expergefaceret timebat , defixis , ex custodia elabentem , egregie repraesentavit .

#### §. XIX.

Restant denique quatuor illae dormientes feminae , ex quibus una ante aram prostrata iacet , reliquae tres in altera parte marmoris conspiciuntur , quae , si quid video , nullae possunt esse aliae , quam *Furiae* , Orestem , in ara sedentem , custodientes , ab Apolline autem ut ille elabi posset , insopitae .

B 5

Quod

(hh) *Eumenid.* v. 44 - 48 .

Quod ad primam attinet, quae ante pedes Orestis prostrata cernitur, cum omni Furiarum ornatu faece ardente ac anguibus crinibus innexis instructa sit, nullum de ea dubium esse potest. Ceteris tribus unum tantum anguem tribuit, in medio earum delabentem; neque tamen crinibus quoque earum serpentes innexos fuisse, qui, cum in ipsa acie marmoris essent exsculpti, temporis iniuria detriti sunt, dubito. Quod autem Winkelmannus unam ex illis non feminam sed virum esse putaverit, cum ita collocata sit, ut neque facies neque pectora conspiciantur, adeoque sexus discerni nequeat, id quidem eodem iure sibi sumsit, quo nos eam feminam esse contendimus. Nostrae tamen sententiae haud parum inde roboris accedit, quod eodem prorsus vestitu, quo caeterae Furiae induta cernitur.

In iis autem repraesentandis sculptor Aeschyli quidem descriptionem secutus est, sed ita ut suo quoque iudicio uteretur. Cum enim Aeschylus eas thronis sedentes fingeret (ii).

Πρόσθιν δὲ τ' ἀνδρὸς τοῦδε θαύματος λόχος  
"Εὐδὲς γυναικῶν ἐν θρόνοισιν ἤμενος.

*Ante virum hunc autem mirabile dormit agmen  
mulierum in thronis residens,*

nostrer, de figurarum dispositione sollicitus, ita eas effinxit, ut unam tantum sedi lapideae insidentem, alteram stantem, dextraque sedi innixam, tertiam denique in terra recumbentem, omnes tamen dormientes, exhiberet. In eo autem praeclare ab Aeschylo discessit, ut cum ille eas horrendas aspectu describeret (kk).

... ἄπτε-

(ii) *Eumenid.* v. 46. 47.

(kk) *Eumenid.* v. 48. 50.

..... ἀπτεροὶ γὰρ μὴν ἰδεῖν  
 Αὐταὶ, μιλαίνας δ' ἐς τὸ πᾶν βρελύνκτροποι,  
 Ἐκ δ' ὀμμάτων λαίβουσι δυσφιλῆ βίαν.

*Sine alis sunt illae, nigrae, horrendae visu, ex oculis autem stillant terrorem;*  
 noster eas iuvenili pulchraque facie effingeret. Id enim eo consecutus est, ut cum eas alias non sine horrore contemplari potuissemus, iam non crudeli & saevo, sed severo tantum vultu, ornatuque adiecto, Furias eas esse admoniti, non sine voluptate eas intueamur.

In earum autem ornatu nonnulla sunt, quae insolita, ac nescio an prorsus nova esse videantur. Cernimus enim omnes esse ocreatas, unam vero securi esse instructam, quod utrumque Amazonum esse solet. Quo si quis Furias eas esse non posse, contenderet, is velim cogitet, primo ceterum earum ornatum faces ac angues Furias eas esse docere; porro omnem hunc ornatum, non ita a Furiarum natura abhorreere ut iis tribui non posset; denique in Furiis describendis poetas non ita sibi constare, ut nihil artificis arbitrio relictum esset. Quod enim primo ad ocreas attinet, cum celeri ac indefesso pede, venatorum instar, reos persequi dicantur, optimo sane iure iis tribuuntur. Sic enim loquentes eas inducit *Aeschylus* (11):

..... Ἐγὼ δὲ  
 Μέτειμι τένοντι φῶτα ὡς κυνηγέτις.

*Ego vero venatoris instar virum hunc persequor.*

Ab

(11) *Eumenid.* v. 231.

Ab *Euripide* autem *Δρομάδες* vocantur (mm).  
Ac nescio an splendida illa *Aeschyli* imago, cum  
eas desuper in reos insilientes depingit, occasionem  
iis dederit (nn):

Μάλα γὰρ οὖν ἄλλομένα  
Ἄγκαθεν βαρυπέσῃ  
Καταφέρω ποδὸς ἀκμὴν,  
Σφαλερὰ τανυδρόμοις  
Κῶλα δ' ὕσφορον ἄταν

*Summa vi desuper insiliens, gravi in eos irruo pe-  
de, tristem ferens perniciem trepido cursu fu-  
gientibus.*

Furias denique ut vocant Etruscas ocreatas re-  
praesentari solere, ut alia monumenta taceam, do-  
cet opus caelatum quo Echelti fabulam repraesentari  
volunt (oo), quod in museo Collegii Romani  
ex argilla fictum, in villa Albani autem mar-  
mori insculptum cernitur.

Eodem autem iure quo ocreae, cum & carniū  
lacerationes & caedes ipsis ab Aeschylo tribuantur,  
securis quoque alteri ex iis data est. Sic enim Ore-  
stem alloquuntur (pp).

Καὶ ζῶντα σ' ἰσχνάνεσ' ἀπάχομαι κάτω.  
*Vivum te emacians ad inferos deducam.*  
atque ibi se versari dicunt ubi (qq):

... Κα-

(mm) *Eurip. Orest. v. 318.*

*Δρομάδες ἢ πτιρόφοι*

*Ποτνιόδες διέει.*

*Celeres, alatae, venerandae Deae.*

(nn) *Aesch. Eumen. v. 374 - 378.*

(oo) *Winkelm. Mon. ined. P. I, p. 105.*

(pp) *Eumenid. v. 267.*

(qq) *Eumenid. v. 186. 187.*

. . . . . Καρνησῆρες ὀφθαλμώρυχαι  
Δίκαι, σφραγί τε .

. . . . . *perniciosae oculorum effossiones, lites & caedes.*

Nec denique, quod modo iam monui aliquid est in quo poetae sibi minus consent, quam in Furiarum descriptione. Sunt enim qui eas dira ac horrenda facie depingunt ut Aeschylus (rr), sunt qui eas virgines dicunt ut Sophocles (ss). Sunt qui eas alatas fingunt, ut Euripides (tt), sunt qui eas sine alis esse dicunt, ut Aeschylus (uu); sunt denique qui eas vel seminudas, vel nudatis saltem brachiis, sunt qui eas nigra veste indutas depingunt (vv).

§. XX.

Vero enim vero, quamvis omnes figurae operis nostri ita ex Aeschilo explicari possint, ut artificem & fabulam ab ipso tractatam repraesentare, & descriptiones eius imitari voluisse dubium prorsus esse nequeat, facile tamen video fore, qui eo offendantur, quod auctor operis nostri scenam hanc ita diviserit, ut figuras ad eam pertinentes in utraque marmoris parte effingeret. Qui tamen cogitent, scenam hanc non esse principem, sed ad locum tan-

(rr) *Eumenid.* v. 51.

(ss) *Sophocl. Electr.* v. 354.

(tt) *Eurip. Orest.* v. 318. ἀπυροφόροι

αὐτοκτενέες θυγαῖ

*Alatae reverendae Deae.* Signum aeneum alatum Furiae Etruscae (quae tamen, quod scio, semper alis sunt instructae) cernitur in amplissima sigillorum antiquorum collectione, quae *Museum Borgianum* Velitris exornat.

(uu) *Aesch. Eumen.* v. 51.

(vv) *Aesch. l.c.*

tantum explendum ab auctore esse additam; adeoque illum commune illud artificum exemplum secutum esse, qui in effigendis iis quae non ad rem ipsam pertinent, multa sibi dare solent, quae in scena principe locum habere non possent. Quod si datum est artificibus, quare non illud concedamus nostro, ut scenam principem, in medio marmore, iam praeclare caelatam, ab utraque parte alia scena cingeret? Sed quid multa? cum in alio eiusdem musei marmore, quod eodem loco, quo Musarum statuae repositae sunt, muro affixum est, eadem figurarum dispositio observatur? Repraesentatur eo *saltatio pyrrhica*, sex autem figurae quas exhibet, ita dispositae sunt, ut non secunda solum cum tertia, ac quarta cum quinta, sed prima quoque cum ultima saltando pugnare videantur. Denique autem dicendum est, nostrum rem ita animo concepis- se, ut tres illae Furiae post aram decumberent, adeoque cum in ipso lapide post aram non amplius locus ei- set relictus, in altera lapidis parte collocandas eas fuisse.

#### §. XXI.

Expositis iam omnibus quae ad singulas figuras pertinent, iam ad altiora progrediendum, consiliumque ac idea totius operis, qualem illam artifex mente conceptam habebat, exponenda est, quo facto de omni opere certum iudicium ferri poterit. Primo itaque omnium, cum sculptoribus non idem datum sit, quod poetis, ut historiam continuam, nobis ante oculos sistant, sed ex omni historia unum tantum temporis momentum spectatorum oculis subiiciant; de eo instituenda est disputatio, quod sibi temporis momentum ex Orestis historia auctor operis nostri repraesentandum sumserit?

Erunt

Erunt forsan, qui, cum Orestem gladio stricto ac averso vultu expressum conspiciunt, in opinionem incident (quod & mihi primum accidit) effingere voluisse artificem ipsam Clytaemnestrae caedem, ac rem ita animo concepisse, ut Orestes, cum matris, pectora inanisque supplices obtendentis, adspectum ferre non posset, aversis oculis eam iugulaverit. Quod quamvis summo artifice non esset indignum, atque verbis illis Orestis apud Aeschylum, Pyladem respicientis ac quaerentis (xx).

Πυλάδῃ τί δράτω, μητέρ' αἰδέσθω κτανεῖν;  
„ Pylades quid faciam; vereor occidere matrem! „  
praesidium ipsi parari possit, esse tamen nullo modo potest. Videmus enim Clytaemnestram iam mortuam humi prostratam, videmus peplum illud iam expansum, videmus denique Furias irruentes, quod utrumque caede iam peracta factum est. Matre enim iugulata Orestes, quod supra ex Aeschilo probavimus, peplum, quo illa olim marito insidias intruxerat, spectatoribus, ex quibus apud nostrum sola Gelisla expressa est, expansum, una cum caesorum corporibus ostendit; subito autem cum in hoc ipso esset occupatus, a Furiis correptus est. Cum itaque Furias iam in eum irruentes in opere nostro cernimus, patet, hoc ipsum temporis momentum, quo diro earum adspectu inopinato oculis obiecto, choro apud Aeschylum haec verba acclamat (yy).

Δμῶναι γυναικες αἰδὲς Τοργόνων δίκην  
Φαιωχίτωνες καὶ πεπλεκτανημέναι  
Πυκνοῖς δράκουσιν, εὐκ' ἐτ' ἄν μέναιμι' ἐγώ.

Ser-

(xx) Choëph. v. 989.

(yy) Choëph. v. 1048.

*Servae! illae Gorgonum in instar nigris vestibus sunt indutae & densis anguibus armatae, non amplius manebo!*

sculptorem sibi exprimendum summis, in quo, si quid video, tanto sane iudicio versatus est, ut melius egerere omnino non potuisset.

Primo enim hoc eo consecutus est, ut quamvis dirum ac crudele facinus oculis subiiceret, illud tamen iam ita mitigaverit, ut spectatoribus non horrorem incuteret, sed eos potius ad misericordiam flecteret. Quodsi enim matrem, supplices manus obtendentem, quodsi filium eam ad supplicium rapiantem, immotoque animo iugulantem, effinxisset, quis tantum facinus cum voluptate intueri potuisset? Atqui cum matrem iam mortuam humi prostratam, cum filium caede peracta subito facinoris conscientia territum Furis, correptum cernimus, quis non tanto adspectu oculis subiecto ad commiserationem movetur? Quod quo studio in omni hoc opere sedatus sit summus artifex, ac contra, ut horrorem incuteret animis, caverit, velim intelligant omnes. Eo enim consilio Orestem, Furiarum impetu perterritum quidem, non tamen horrentem, eo consilio matris occisae vultum compositum, ac dormienti potius quam mortuae similem, corpus vero integrum non laceratum, eo denique consilio Furias non dira saeva, sed juvenili ac severa tantum facie exprestit. Quidquid autem horroris in omni opere esset, illud summo iudicio in Aegisthum transtulit, quem supinum a folio deiectum, ac terra prostratum cernimus. Atqui quis non gaudet, cum foedum, timidumque adulterum meritis scelerum poenas tulisse videt?

In



In omni porro Orestis historia nullum erat temporis momentum, quo & tantas & tam varias figuras oculis subiicere potuisset. Quodsi enim caedem ipsam expressisset, neque Furiis neque Gelissae locus fuisset; solo autem comitum numero, nullo charactere distinctorum, scenam ornare, ieiunum videtur. Atqui in nostro opere, (loquor autem de scena tantum principe) oëio figuras cernimus, quarum nulla, fide historiae servata, abesse poterat. Neque vero figurarum solum copia, sed varietate quoque spectatorum oculos delectare potuit, cum ex omnibus quae cernuntur, si Furias exceperis, ne duae quidem sint, quae non charactere plane sint diverso.

Denique cum hoc temporis momentum exprimendum sibi fumeret, id quoque eo consecutus est, ut tantam Orestis historiae partem oculis subiecerit, quantam nullo alio modo exprimere potuisset. Quamquam enim unitatem, ut vocant, actionis, religiose observaverit, iis tamen quae in scena cernimus, cum & peplum illud expansum, & nutrix Gelissa, & caelorum corpora conspiciuntur, ea quae antea gesta erant, facile divinamur.


#### §. XXII.

Quod denique ad figurarum dispositionem attinet, eam ita ab artifice institutam esse cernimus, ut rei ipsius ratio postulabat, id est, ut melior esse non possit. Primas enim, principesque figuras, Clytaemnestram & Orestem, medio loco positas cernimus, quibus qui secundum locum occupare debebant, Aegisthus & Pylades, a dextra sunt. Pyladi enim aptiorem locum tribui non potuisse, quam ut, cum caedis esset socius, Aegistho caeso adila-

adstaret, facile vident omnes. Nutrix vero Gelîsa & servus Orestis ab utraque parte agmen quasi claudunt. Furias, cum subito & inopinato irruerent, summo iudicio in posteriori scenae parte, ac peplo expanso maxima ex parte obtectas, caelavit. Si vero sint, qui Electram in opere nostro desiderent, meminerint, secutum in hoc esse artificem & Aeschyli & aliorum poetarum auctoritatem, qui omnes in eo consentiunt (22), Electram caedi non adfuisse, sed aedium custodiam ipsi fuisse demandatam.

---

(22) *Aesch. Choëph.* v. 577. *Eurip. Orest.* v. 1218.  
*Soph. Electr.* v. 1402.



*Long. 9 Alt. 2  $\frac{1}{2}$  palm.*

